



Catschaduras, catschadurs e candidats han luvrau questa primavera vid il biotop.

MAD

En favur dil spazi da viver

Il biotop a Davos Casti a Mustér/Clavaniev ei vegnius sanas

DA HANS HUONDER / ANR

■ **La Secziun da catschadurs Péz Alpetta ha luvrau questa primavera intensivamein vid il biotop a Davos Casti ella vischinonza da Clavaniev. Quei biotop haveva piars per part sia funcziun.** Onn per onn prestan catschadurs e candidats per la patenta da catscha el cantun Grischun rodund 25 000 uras lavur da tgira en favur dalla fauna e flora. Quintau entuorn ei quei circa 12 plazzas da lavur cumpleinas. Quei engaschament muossa che catschaduras e catschadurs enonuschan la natira buca mo duront il temps da catscha. Igl engaschament en favur digl ambient entscheiva la primavera cun il spindrament d'anseuls cavriel els praus che vegnan segai e cala la fin digl onn cun metter ora tablas per far atenziun sin las zonas da ruaus. Denteren prestan las secziuns autras lavurs che vegnan dabien era ad animalets che vivan per

gronda part el zuppau, mo ch'ei d'eminenta impurtonza per la biodiversidad.

Pli bia spazi da viver

Biotops ein impurtons spazi dalla natira. Deplorablamein ein biars dad els svani pli baul muort novas tendenzas ell'agricultura ni era muort construcziuns da baghetgs e colligiazziuns. Avon rodund 30 onns ei vegniu erigiu a Davos Casti ella vischinonza da Clavaniev sin intschess dalla vischnaunca da Mustér in biotop. La lavur persuerter era vegnida prestada dalla truppa dalla protecziun civila. Damai che la tgira persuerter ha muncau ils davos onns ei quei spazi da viver buca mo ius en emblidnza, mobein ha era piars empuet sia funcziun. Sin impuls da vischinas e vischins ei la Secziun da catschadurs Péz Alpetta sedecidida da projectar ed exequir la sanaziun da quei biotop ed aschia da reactivar quei spazi da viver. Essend che quei biotop sesanfla

sper ina senda da viandar bein frequentada vul la secziun era mantener quel egl avegnir.

Prestau buna lavur

Sut l'egida dil cau-tgira dalla secziun, *Thomas Schmed*, ed en entelgientscha cun *Ervin Maissen* digl Uffeci da baghegiar dalla vischnaunca da Mustér, ein las lavurs sesplegadas la primavera. Las duas parts dil biotop ein vegnidas cavadas ora da niev. Il medem mument ei vegniu allontanau plontas e caglias. Ina part da quella eran plontas jastras. Per garantir ch'il biotop piardi buc aua egl avegnir ei vegniu integrau ina folia en quel. Pigl auter eis el vegnius formaus e construius cun material el liug. Tenor indicaziuns da Thomas Schmed han ils catschadurs e candidats prestau cheu rodund 145 uras da lavur. Il biotop seprenta uss en in niev stan e fa aschia buca mo plascher alla natira, mobein era als viandonts.